

Metropo-  
lis.

Totius porro regni metropolis est *Neapolis*, de qua post. Domicilium ibi non solum plerisque Principibus & Nobilibus, verum etiam regis Legato, quem *Vice-Regem* nominant, variisque Conciliis.

Regimen.

Septem Principales sunt Magistratus, qui regi confidere soliti: ad dextram quidem I *Magnus Comestabilis*, II *Magnus Admirans*, III *Magnus Protonotarius*: ad sinistram; I *Magnus Iustitarius*, II *Magnus Cubicularius*, III *Magnus Cancellarius*: ad pedes denique regis; *Magnus Seneschallus*. *Magnus Comestabilis*, vulgo *Gran Comestabile*, principem obtinens locum, generalis est præfectus rei militari, bellicoque apparatus. Creatum rex, porrecto gladio, verbis alloquitur, quæ Latine sic sonant: *Accipe sacrosanctum hunc gladium, quo conficies hostes populi mei*. *Magnus Iustitarius*, *Gran Giustitiero*, jurisdictionem habet in causis, & civilibus & criminalibus, eique hic parent subjectique sunt omnes, Principes, Duces, Marchiones, Comites, Barones, Dynastæ & alii. Vicarius ejus vulgo dicitur *Reggente della Vicaria*. *Magnus Admirans*, *Gran Admirante*, vel *Admiraglio*, rebus præest universim maritimis, mera etiam præditus jurisdictione. *Magnus Cubicularius*, qui vernacule *Camerario*, vel *Camerlingo*, curam gerit non solum personæ regis, ejus lecti & vestimentorum; verum etiam Fiscus, reddituum, vectigalium, idque genus aliorum. Subest illi nobilis Cubiculariorum & Thesaurariorum cohors. *Magnus Protonotarius*, *Gran Protonotario*, chartarum regiarum est custos, auctoritatem habens creandi Notarios Iudicesque, & nothos legitimandi. Rex Catholicus dignitatem hanc transtulit ad Cancellariam regiam. *Magnus Cancellarius*, *Gran Cancelliero*, litteras scribit regis secretiores; Sigillo magno munit privilegia ab rege subditis concessa: Aca-

demicos in oculis gerit. *Magnus* denique *Seneschallus*, vernacule *Gran Siniscalco*, *Major-Domo*, & *Mastro di Casa* nominatus, regiam domum gubernat; procurans quæcumque ad victum amictumque familiæ regis, ejusque castigans & puniens delicta. Archiepiscopatus supra commemoravimus. Principes, Comites & Marchiones plurimos habet. Baronum Nobiliumque familiarum incredibilis est per totum hoc regnum numerus. *Concilia* sunt sex: I *Viceregis*, quod *Collaterale* dicitur, in quo gravissima tractantur totius regni negocia, aliaque, quæ eo evocantur. Caput est *Vicerex*; Adfessores nonnulli Comites. II *S. Clara*, quod ita ab loco, quo cogi solitum, vocatur: *Sacrum* etiam nominatum. Præses hic & Consilarii cognitionem habent causarum omnium, quæ ab Vicaria per provocationem eò devolvuntur. III *Vicaria*. Hic ab Regente Neapolitano, qui Vicarius est Magni Iustitarii, quatuorque Iuris Doctoribus, qui singulis annis renovantur, Ius dicitur, justitiaque administratur omnibus Regni subditis, per appellationem ab inferioribus iudicibus eò venientibus. IV *Summaria*: Hic Ratiocinarium est, ibique quæ ad Fiscum & Regni vectigalia pertinent, curantur. Constat ex Vicario, sex Præfidiis, octo Ratiocinariis, decem, ut vocant, Clericis, & aliis. V *Admiralitis*: Hic totius maris Præfecturæ est domicilium. Jurisdictionem exercet in nautas & quæcumque ad illos, tam criminalem, quam civilem. VI *Monetarium*: in quo cognoscitur & civiliter & criminaliter cum de aliis, tum de Regni totius monetis, ponderibus, mensuris, idque genus aliis. Caput illi Præfectus rei monetariæ: cui adsunt Magistri, ut loquuntur, rationales, probitatis monetæ Examinator, Pensitator, & alii.